

Bil. 23

Selasa

9 Julai 2019



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL KEDUA
MESYUARAT KEDUA**

KANDUNGAN

UCAPAN DI BAWAH USUL BERKENAAN PERKARA TADBIR KERAJAAN [P.M.17]:

- **Keperluan Segera untuk Mewujudkan Universiti Penuh di Sandakan**
- YB. Puan Vivian Wong Shir Yee (Sandakan) [Halaman 1]
- **Pingat Jasa Malaysia**
- YB. Tuan Sivakumar Varatharaju Naidu (Batu Gajah) [Halaman 4]

**MALAYSIA
KAMAR KHAS
PARLIMEN KEEMPAT BELAS
PENGKAL KEDUA
MESYUARAT PERTAMA**

Selasa, 9 Julai 2019

Mesyuarat dimulakan pada pukul 2.30 petang

DOA

*[Timbalan Yang di-Pertua (Tuan Nga Kor Ming)
mempengerusikan Mesyuarat]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

**Keperluan Segera untuk Mewujudkan Universiti Penuh
di Sandakan**

2.34 ptg.

Puan Vivian Wong Shir Yee [Sandakan]: Terima kasih Tuan Yang di-Pertua. Selamat petang dan salam sejahtera. Yang Berhormat Menteri Pendidikan, saya ingin membawa perhatian kepada Yang Berhormat tentang keperluan segera untuk mewujudkan sebuah universiti penuh di Sandakan. Menurut statistik yang terdapat dalam laman web Kementerian Pendidikan, sehingga 31 Mac 2019, Malaysia mempunyai 20 universiti awam dan 63 universiti swasta dan kampus cawangan universiti luar negara.

Di antara 20 buah universiti awam ini, 18 adalah terletak di Semenanjung Malaysia, satu di Sabah dan satu di Sarawak. Bagi 63 buah universiti swasta dan kampus cawangan universiti luar negara yang sedia ada, 60 adalah terletak di Semenanjung Malaysia, tiga buah di Sarawak dan tiada satu pun yang terletak di Sabah.

Tuan Yang di-Pertua, marilah kita membanding ini dengan angka penduduk Malaysia. Menurut portal rasmi Jabatan Perangkaan Malaysia, pada tahun 2016, penduduk Malaysia telah mencapai 31.70 juta orang, iaitu 25.14 juta di Semenanjung, 3.80 juta di Sabah dan 2.76 juta di Sarawak. Berdasarkan maklumat di atas, bilangan penduduk untuk setiap universiti (awam dan swasta) yang sedia ada ialah:

- (i) 406,410 untuk Semenanjung Malaysia;
- (ii) 690,000 untuk Sarawak; dan

(iii) 3.8 juta untuk Sabah.

Angka-angka di atas menunjukkan sejauh mana Sabah telah tertinggal di sebalik negeri-negeri lain dalam bidang pembangunan pendidikan. Sebab ini, hampir 100 peratus lepasan SPM dan STPM dari Sandakan terpaksa meninggalkan Sandakan untuk melanjutkan pendidikan mereka di tempat-tempat lain seperti Kota Kinabalu, Miri, Kuching, Kuala Lumpur, Singapura atau Australia.

Tuan Yang di-Pertua, ini menyebabkan kerugian besar ekonomi tempatan kerana wang aliran keluar untuk menyokong pelajaran mereka di luar Sandakan. Di samping itu, selalunya ramai pelajar ini tidak akan kembali ke Sandakan selepas melengkapkan pelajaran mereka. Ini menyebabkan situasi "*brain drain*" yang serius bagi Daerah Sandakan.

Pada tahun 2006, Universiti Malaysia Sabah (UMS) telah menubuhkan Fakulti Pertanian Lestari di kampus Sungai Batang di Sandakan. Walau bagaimanapun, setakat ini hanya menawarkan tiga program mahasiswa sahaja, iaitu *Crop Production*, *Horticulture and Landscaping* dan *Live Stock Production*. Pilihan yang terhad ini memang sukar untuk memenuhi aspirasi pelajar-pelajar yang layak untuk melanjutkan pendidikan di universiti.

Tuan Yang di-Pertua, pendidikan tinggi merupakan kunci untuk memupuk tenaga kerja mahir dan berpendidikan untuk mengembangkan ekonomi kita. Saya ikhlas menggesa Yang Berhormat Menteri Pendidikan untuk mewujudkan sebuah universiti penuh di Sandakan bagi mengatasi isu kekurangan institut pengajian tinggi ini dengan segera dan pada masa yang sama, membantu memulihkan ekonomi tempatan untuk manfaat rakyat.

2.38 ptg.

Timbalan Menteri Pendidikan [Puan Teo Nie Ching]: Terima kasih Tuan Yang di-Pertua, terima kasih Ahli Yang Berhormat. Terlebih dahulu saya ingin mengucapkan tahniah kepada Yang Berhormat Sandakan kerana telah memenangi dan dipilih untuk mewakili suara rakyat Sandakan di Dewan yang mulia ini dalam pilihan raya kecil yang lepas. Semoga Yang Berhormat dapat menggalas tugas dengan sebaiknya seperti yang telah dilakukan oleh mendiang ayahanda Yang Berhormat.

Tuan Yang di-Pertua, Kementerian Pendidikan Malaysia (KPM) mengucapkan terima kasih kepada Ahli Yang Berhormat Sandakan terhadap keprihatinan Yang Berhormat membangkitkan isu berkaitan keperluan segera untuk mewujudkan universiti penuh di Sandakan dalam Kamar Khas pada kali ini.

KPM mengambil maklum dan menghargai cadangan Yang Berhormat supaya sebuah universiti penuh ditubuhkan di Sandakan bagi mengatasi isu kekurangan institut pengajian tinggi

dengan segera dan pada masa yang sama, membantu memulihkan ekonomi tempatan untuk manfaat rakyat setempat. Walau bagaimanapun, terdapat 20 buah universiti awam, 36 buah politeknik dan 102 buah kolej komuniti di seluruh negara. Buat masa ini, KPM sedang menumpukan perhatian dan usaha untuk mengukuhkan kualiti institusi pengajian tinggi tempatan dan tidak berhasrat untuk menambah bilangan institusi ini.

Untuk makluman Ahli Yang Berhormat, bagi negeri Sabah terdapat institusi pendidikan tinggi seperti berikut:

- (i) Universiti Malaysia Sabah (UMS) iaitu UMS Kampus Kota Kinabalu, UMS Kampus Sandakan, UMS Kampus Tawau dan UMS Kampus Labuan;
- (ii) Universiti Teknologi MARA (UiTM) iaitu UiTM Kampus Kota Kinabalu dan UiTM Kampus Tawau;
- (iii) tiga buah politeknik iaitu Politeknik Kota Kinabalu, Politeknik Sandakan dan Politeknik Tawau; dan
- (iv) 25 buah institusi pendidikan tinggi swasta (IPTS) yang didaftarkan di negeri Sabah sehingga Mac 2019, iaitu 23 buah daripadanya adalah bertaraf kolej dan dua bertaraf kolej universiti.

■1440

Selain daripada itu, KPM juga telah menubuhkan lapan kolej komuniti di Sabah iaitu Kolej Komuniti Tawau, Kolej Komuniti Semporna, Kolej Komuniti Lahad Datu, Kolej Komuniti Sandakan, Kolej Komuniti Beaufort, Kolej Komuniti Tambunan, Kolej Komuniti Penampang dan Kolej Komuniti Kota Marudu.

Tuan Yang di-Pertua, untuk makluman Yang Berhormat, penubuhan sesebuah institusi pengajian tinggi awam mahupun cawangannya dibuat berdasarkan keperluan strategik negara. Hal ini dibuat dengan mengambil kira kemampuan pembiayaan kerajaan, kepentingan bidang tujahan (*niche area*), dengan izin, tertentu terhadap pembangunan sosioekonomi negara, sumber manusia yang mencukupi serta keperluan sumber tenaga yang diperlukan dalam pasaran kerja.

Setiap program akademik yang akan ditawarkan oleh universiti awam perlu melalui KPM dan mendapat kelulusan sebelum ditawarkan kepada umum. Program akademik yang hendak ditawarkan juga mesti mengambil kira keperluan guna tenaga dan bidang kritikal yang telah dikaji dan dibentangkan oleh pihak Jabatan Perkhidmatan Awam, Jabatan Perangkaan Malaysia, Institut Maklumat dan Analisis Pasaran Buruh (ILMIA), Kementerian Perdagangan Antarabangsa dan Industri (MITI), Lembaga Pembangunan Pelaburan Malaysia (MIDA), TalentCorp, *Jobstreets* dan lain-lain agensi berkaitan yang terlibat dalam mesyuarat saringan awal dan perakuan program. Ini bagi memastikan program akademik yang ditawarkan dapat memenuhi keperluan guna tenaga

negara dan tidak berlaku lambakan graduan dalam bidang-bidang dan pekerjaan yang tidak diperlukan.

Selain daripada itu, universiti awam dan Jabatan Pendidikan Politeknik dan Kolej Komuniti (JPPKK) juga diwajibkan untuk menjalankan kajian pasaran bagi program yang akan ditawarkan dari semua segi termasuklah lokasi penawaran program tersebut. Lokasi penawaran sesuatu program memainkan peranan yang penting dalam menentukan permintaan sesuatu program agar program yang ditawarkan selaras dengan kehendak bukan sahaja daripada penduduk setempat malah melangkaui sempadan negeri.

Sebagai makluman Yang Berhormat, terdapat tambahan program-program yang ditawarkan di UMS Kampus Sandakan seperti Ijazah Doktor Falsafah, Ijazah Sarjana Sains Pertanian, Ijazah Sarjana Pendidikan, Ijazah Sarjana Psikologi Kaunseling selain program *Crop Production, Horticulture and Landscaping* dan *Live Stock Production*. Pada masa ini seramai 398 orang pelajar sedang mengikuti pengajian dalam peringkat sarjana muda, sarjana dan kedoktoran (PhD) di Universiti Malaysia Sabah (UMS) di kampus Sandakan. Sukacita dimaklumkan bahawa UMS Kampus Sandakan mampu menampung 1,000 orang pelajar dalam suatu masa. Maksudnya belum sampai *maximum capacity* lagi.

Timbalan Yang di-Pertua [Tuan Nga Kor Ming]: Ya, belum diisi penuh.

Timbalan Menteri Pendidikan [Puan Teo Nie Ching]: Yes. Berdasarkan kepada penerangan yang dinyatakan tadi, adalah diharapkan dapat menjawab persoalan-persoalan yang dikemukakan oleh Ahli Yang Berhormat Sandakan. KPM juga sentiasa bersedia untuk bekerjasama dengan semua pihak dan sentiasa mengambil maklum perkembangan terkini tentang keperluan akses kepada pendidikan tinggi serta pasaran kerja secara global dan khususnya di negara ini. Cadangan bernas daripada Ahli Yang Berhormat sentiasa dihargai dan dipertimbangkan oleh KPM demi membuka peluang kepada penduduk Sandakan khususnya meningkatkan ilmu pengetahuan dan kemahiran anak-anak Malaysia secara umumnya. Sekian, jawapan saya. Terima kasih Tuan Yang di-Pertua.

Pingat Jasa Malaysia

2.44 ptg.

Tuan Sivakumar Varatharaju Naidu [Batu Gajah]: Terima kasih Tuan Yang di-Pertua dan terima kasih juga saya ucapkan kepada Timbalan Menteri Pertahanan kerana sudi datang menjawab soalan saya berkaitan dengan Pingat Jasa Malaysia.

Pingat Jasa Malaysia dianugerahkan kepada anggota veteran tentera bagi menghargai jasa dan sumbangan mereka berdasarkan kriteria-kriteria berikut:

- (i) telah berkhidmat atau terlibat dalam operasi secara berterusan selama tiga bulan dan ke atas atau telah bertugas secara langsung tidak kurang dari enam bulan di mana-mana pasukan atau formasi Angkatan Tentera Malaysia bagi tempoh dari 1 Januari 1969 hingga 2 Disember 1989 bagi operasi menentang Parti Komunis Malaya (PKM);
- (ii) telah berkhidmat atau terlibat dalam operasi secara berterusan selama tiga bulan dan ke atas atau telah bertugas secara tidak langsung tidak kurang dari enam bulan di mana-mana pasukan atau formasi Angkatan Tentera Malaysia bagi tempoh 1 Januari 1969 hingga 17 Oktober 1990 bagi operasi menentang Parti Komunis Kalimantan Utara (PKKU); dan
- (iii) telah terbunuh, cedera atau menjadi kurang upaya disebabkan oleh tugas menentang Pengganas Komunis Malaya (PKM) bagi tempoh 1 Januari 1969 hingga 2 Disember 1989 atau Pengganas Komunis Kalimantan Utara (PKKU) bagi tempoh 1 Januari 1969 hingga 17 Oktober 1990.

Baru-baru ini, ada khabar yang mengatakan bahawa penerima Pingat Jasa Malaysia akan diberikan sesuatu imbuhan. Adakah ini benar? Jika tidak, adakah kerajaan mempunyai apa-apa rancangan untuk memberi imbuhan kepada penerima Pingat Jasa Malaysia pada masa akan datang?

Selain itu, apakah pingat-pingat lain atau imbuhan lain yang diberikan kepada anggota veteran tentera yang telah berjasa kepada negara. Bagaimanakah Kementerian Pertahanan mengambil inisiatif untuk menjaga kebajikan veteran dan keluarganya? Terima kasih.

2.47 ptg.

Timbalan Menteri Pertahanan [Tuan Liew Chin Tong]: Terima kasih Tuan Yang di-Pertua dan terima kasih Ahli Parlimen Batu Gajah. Tuan Yang di-Pertua, Mesyuarat Majlis Veteran Kebangsaan (MVK) yang telah bersidang pada 28 Februari 2019 telah bersetuju dengan Kertas Kerja Cadangan Pemberian Elaun Kenangan kepada Penerima Pingat Jasa Malaysia (PJM) dan

seterusnya akan membawa perkara ini untuk perhatian kerajaan pusat. Dijangka seramai 68,804 orang penerima PJM akan menikmati Elaun Kenangan ini, sekiranya dipersetujui kerajaan.

Untuk maklumat Yang Berhormat, kerajaan turut menganugerahkan pingat kepada veteran ATM bagi mengenang pengorbanan dan khidmat bakti cemerlang veteran semasa dalam perkhidmatan ATM dengan penerima pingat ini mendapat elaun kenangan secara bulanan. Antara pingat-pingat berkenaan ialah:

- (i) Seri Pahlawan Gagah Perkasa (SP), di mana pada masa ini hanya diterima oleh seorang veteran yang masih hidup dengan elaun diterima sebanyak RM2,000 sebulan;
- (ii) Panglima Gagah Berani (PGB), diterima oleh seramai 44 orang veteran yang masih hidup dengan setiap penerima mendapat elaun sebanyak RM1,500 sebulan;
- (iii) Jasa Perkasa Persekutuan (JPP); diterima oleh seramai enam orang veteran yang masih hidup dengan setiap penerima mendapat elaun sebanyak RM1,000 sebulan; dan
- (iv) Pingat Tentera Udara (PTU), di mana pada masa ini diterima oleh seramai 24 orang (yang meliputi tiga orang yang masih dalam perkhidmatan dan 21 orang veteran ATM) dengan setiap penerima mendapat elaun sebanyak RM1,000 sebulan.

Selain itu, terdapat veteran ATM yang telah dianugerahkan pingat daripada Kerajaan British yang turut diberikan elaun kenangan secara bulanan. Pingat-pingat berkenaan ialah:

- (i) *George Cross* (GC), di mana pada masa ini hanya diterima oleh seorang veteran yang masih hidup dengan nilai elaun sebanyak RM2,000 sebulan;
- (ii) *George Medal* (GM), diterima oleh seorang veteran yang masih hidup dengan nilai elaun sebanyak RM1,500 sebulan;
- (iii) *Military Cross* (MC), diterima oleh dua orang veteran yang masih hidup dengan nilai elaun setiap penerima ialah sebanyak RM1,500 sebulan; dan
- (iv) *Military Medal* (MM), diterima oleh seorang veteran yang masih hidup dengan nilai elaun sebanyak RM1,500 sebulan.

■1450

Tuan Yang di-Pertua, bagi menjaga kebajikan veteran ATM dan keluarganya, Kementerian Pertahanan telah menyediakan pelbagai bentuk skim bantuan kebajikan seperti:

- (i) Bantuan Sara Hidup;
- (ii) Bantuan Kemasukan Persekolahan dan Kolej Vokasional Kebangsaan;

- (iii) Bantuan Kemasukan ke Institusi Pengajian Awam atau Politeknik;
- (iv) Bantuan Perubatan;
- (v) Bantuan Peralatan Pesakit;
- (vi) Bantuan Bencana Alam; dan
- (vii) Bantuan Pengurusan Jenazah.

Pada tahun 2019, sejumlah RM98.42 juta telah diperuntukkan untuk bantuan-bantuan kebajikan ini kepada veteran dan balu veteran ATM yang layak bagi membantu meringankan beban hidup mereka.

Pada tahun ini juga, kerajaan telah meluluskan pemberian inisiatif Bantuan Harapan Negara (BHN) 2019 yang merupakan inisiatif baharu bagi menggantikan Bantuan Bakti Negara (BBN) 2017 dan Sumbangan Veteran Tidak Berpencen 1Malaysia (SVTB1M) 2013. Bagi melaksanakan inisiatif ini, kerajaan telah memperuntukkan sebanyak RM79.68 juta untuk diagihkan secara *one-off* kepada seramai 159,368 orang veteran ATM berpencen dan veteran ATM tidak berpencen yang layak untuk menerimanya dengan kadar pemberian sebanyak RM500 seorang. Pelaksanaan inisiatif ini adalah lebih bersasar di mana penerimanya adalah veteran ATM di dalam kategori isi rumah berpendapatan 40 peratus terendah (B40).

Kerajaan sentiasa komited untuk menambah baik skim kebajikan kepada veteran ATM dari semasa ke semasa demi kesejahteraan hidup mereka serta sebagai pengiktirafan terhadap pengorbanan mereka dalam menjaga dan memelihara kedaulatan dan keamanan negara. Terima kasih Tuan Yang di-Pertua.

Timbalan Yang di-Pertua [Tuan Nga Kor Ming]: Terima kasih Yang Berhormat Menteri. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang, hari Rabu, 10 Julai 2019.

[Kamar Khas ditangguhkan pada pukul 2.53 petang]